

Cu organisacion di Green Education Symposium

Minister Dowers ta elogia Biblioteca Nacional



ORANJESTAD - Biblioteca Nacional di Aruba, cual ta resorta bao di maneho di Minister di Enseñansa Arthur Dowers a haci un excelente trabao den transmiti e mensahe di e importancia di cuida di nos medio ambiente y con pa contribui activamente na e bienestar di planeta Tera cu un Green Education Symposium. E symposium aki a tuma luga dialuna y diamars na Westin Resort. Minister Dowers a expresa aprecio pa

e organisadonan, como tambe pa e sosten valioso y partnership di SETAR N.V. pa por a realisa e evento grandi aki. Pa e dos dianan di e symposium, a conta cu participacion di mas di 2000 alumno di diferente scol secundario y EPI.

Durante e apertura di e symposium Minister Dowers a pidi e hobennan pa aplica nan rol como esnan cu ta transmiti e mensahe di un bida mas den



harmonia cu medio ambiente na nan cas. E hoben tin influencia riba e comportacion di nan mayornan y decisionnan cu ta wordo tuma den e cas. Si e hoben cuminsa aplica algun tip simpel, pero facil, pa spaar awa y coriente y cuminsa motiva nan mayornan pa move den e direccion di escogencianan cu ta envolve energia alternativo, indudablemente e comportacion den e cas ta cambia pa miho, segun Minister Dowers.

E enfoke di e symposium tabata riba e uzo di energia alternativo y e desaroyo di esaki pa yega na un comunidad sostenibel.

E prome Green Education Symposium a conta cu oradonan experto den e ramo di preservacion di energia y energia alternativo manera Drs. Gert Kooistra, kende ta strategisch planoloog na Planosfeer na Breda, Hulanda y Ing. Freddy Vargas, Energy Management Adviseur di NV Elmar. □



Minister di Enseñansa Arthur Dowers

“Loke ta traha den bo klas tambe ta traha na cas”

ORANJESTAD - For di momento cu Minister di Enseñansa, Arthur Dowers a bishita e workshop “Conscious Discipline” pa prome biaha, el a dicidi cu tur cabesante y maestronan di scolnan preparatorio y basico (kleuter y basisscholen) na Aruba mester haya e oportunidad pa siña e tecnicnan cu ta wordo comparti durante e sesionnan aki. Tabata bisto cu e sistema aki,

cual ta wordo ofreci na Aruba pa Develop to Grow y ta wordo aplica na Centronan Traimerdia ta duna resultadonan positivo. Cu expansion di e programa riba iniciativa di Minister Dowers, kende a percura pa sponsor e participacion pa tur maestro di scol basico, dia tras dia e ta topa mas maestro di scol cu ta bis’e cu nan ta haci bon uzo di Conscious Discipline hasta

na nan cas. Pa e workshopnan aki ta conta cu e apoyo di Develop to Grow, cual ta wordo encabesa pa Helen Guda, y e experticio di e facilitado internacionalmente reconoci, Jill Molli.

“Loke ta traha den bo klas tambe ta traha na cas,” Minister Dowers a subraya diamars mainta na apertura di e workshop na Renaissance Convention Center. El a ilustra cu un maestra a cont’e cu despues di e prome dia di e workshop el a yega cas y a wak cu cosnan no a wordo haci manera e tabata kier, pero el a corda kico nan a siñ’e, subi su auto, dal un rond y despues enfrente cosnan cu un tranquilidad cual ta algo cu no lo a pasa prome cu el a tuma e curso. Minister Dowers a remarca cu el a yega di duna les, pero



na adulto y cu e tin hopi admiracion pa e trabao di e maestronan di scol kende ta traha cu mucha mas hoben, pasobra e no ta un trabao facil. E ta un trabao cu ta rekeri hopi dedicacion y pasenshi y e manda-

tario a expresa cu e ta spera cu tur esnan presente lo disfruta hopi y haci bon uzo di e diferente tecnicnan, idea y instrumentonan cu nan ricibi di Jill Molli den e dos dianan di e workshop aki. □

